

Kyrkjeklokka

Nr. 2 – 2017

Kyrkjeblad for Hornindal, Innvik og Stryn prestegjeld

81. årgang

Saman endrar vi verda



Førre utgåva av Kyrkjeklokka hadde fokus på Fasteaksjonen som i år heitte **Ja, vi elsker dette vatnet**. Kirkens Nødhjelp er kyrkjelydane sin internasjonale hjelpeorganisasjon, og på denne nasjonale dugnaden gjekk konfirmantane våre saman om å samle inn pengar til det arbeidet Kirkens Nødhjelp gjer over heile verda. **Change-maker** er ungdomsorganisasjonen til Kirkens Nødhjelp, og her har konfirmantane våre vore aktive i denne tida.

Solidaritet og nestekjærleik, engasjement og omsorg er viktige tema. Omsorg for andre, fredsarbeid og vern av klima og miljø er nokre av oppgåvene våre. Desse utfordringane treng engasjerte unge som kan jobbe for å skape ei meir rettferdig verd – lokalt og globalt. Som konfirmant betyr du noko for andre. I konfirmasjonstida snakkar vi om nestekjærleik og om nåde – slik Gud viser nåde mot oss, skal vi vise nåde mot kvarandre – vi er alle skapt i Gud sitt bilde.

Fattigdom er urettvist. Det er nok reint vatn og mat til alle, men spelereglane gjer dei rikaste rikare og dei fattigaste fattigare. Saman kan vi gi dei stemmelaus ei stemme der avgjerdene blir tekne. Jesus lærte oss mykje om korleis vi menneske skal leve saman, og korleis vi skal ta vare på kvarandre og den verda vi lever i. Dette har vi teke på alvor i konfirmasjonstida.

Konfirmasjon, ei tid for nye opplevingar

Alle norske ungdommar blir inviterte til konfirmasjon når dei er 14 år gamle. Då kan dei vere med på eitt års seminar for å lære meir om innhaldet i den kriste trua, og desse samlingane må dei ha på fritida si. Konfirmasjonstida i kyrkja er ikkje berre for den som trur – å vere konfirmant i kyrkja er like mykje for den som tvilar eller berre er nysgjerrig. I konfirmasjonstida får dei sjansen til å utforske mange viktige spørsmål saman med andre. Som konfirmantar får dei lære meir om både Gud og seg sjølve. Vi snakkar om livet – på godt og vondt, samtidig som dei får mange nye opplevingar. Reisa fram til den høgtidelige konfirmasjonsdagen er spennande. 85 prosent av alle norske 15-åringar konfirmerte seg i kyrkja i 2016.

Les meir side 10, 11 og 12

God sommar!

Ordinasjon



I Den norske Kyrkja er vilkåret for å bli ordinert at ein er tilsett i («kalla til») ei konkret teneste som krev fullmakt til å forkynne og forrette dåp og nattverd. Det vert kravd teologisk eksamen og praktisk-teologisk eksamen. Før ordinasjonen må den som skal ordinerast (ordinanden) ha ei inngåande samtale med den som skal ordinere (ordinator, dvs. biskopen). Sjølve ordinasjonshandlinga føregår i ramma av ei høgmesse der biskopen forrettar, assistert av prost og 3–5 prestar. Ved prestevigsla gjev ordinanden eit løfte, der han/ho lovar å forkynne Guds ord ifølgje Skrifta og Kyrkja si vedkjenning, forvalte sakramenta etter Kristi innstifting og Kyrkja sin orden, formane kyrkjelyden til omvending, tru og heilagjering, samt sjølv å leve etter Guds ord og å legge vinn på stadige teologiske studie.

Les meir side 2 og 3

Hege Høibye, ny prest i Hornindal sokn

Brynhild Lund Notøy

Dei første barneåra budde Hege på Lysaker. Så flytte familien til Ullern der Hege og tvillingsystera byrja på skule.

I 8–9-års alderen vart Hege interessert i hestar og riding. Ho fekk instruksjon på ein rideskule. Av og til fekk ho vere med å stelle hestane. I byrjinga reid ho på mange forskjellige hestar, men etter kvart fekk ho ein fast hest. Denne hobbyen hadde ho til ho var ferdig med vidaregåande skule. Då flytte ho til Troms og gjekk eitt år på folkehøgskule. Der lærte ho å spele gitar til «husbruk». Sjølv har ho lært seg litt på trommer og fløyte. Det er enkle instrument som er fine å bruke i forteljar-samanheng.

Så gjekk turen til Trondheim og NMS sin bibelskule. Ho gjekk kunst- og kulturlinje. Det var her ho for alvor byrja interessere seg for forteljarkunsten.

Familien har alltid vore viktig for Hege. Foreldra til Hege var med å starte Acem meditasjon. Far hennar var i India i samband med arbeidet sitt, og han kom heim med eit teikneseriehefte om hinduismen. Det gjorde inntrykk på Hege. Mor hennar var religionslærer. Hege fekk difor brei kulturell påverknad, og lærte mykje om fleire religionar. Ho lærte den norrøne skaparmyten før ho kjende den bibelske skapings-soga. Heile tida kjende ho at det var kristen ho var, og landet ho budde i var eit kristent land.

Interessa for kristendomen kom med konfirmasjonsførebuingane. Ho vart med i ungdomsarbeidet i Ullern Kirke, og ho følte at ho møtte Gud der.

Etter bibelskulen fekk ho vikariat som kyrkjetenar i Gamle Aker Kirke i 1997.

I 2002 vart ho fast tilsett. Det arbeidet hadde ho i 10 år. Ho hadde hovudansvaret for dei praktiske rammene rundt ei gudsteneste. Når friviljuge deltok, hadde ho ansvar for å informere dei om gangen i gudstenesta og korleis dei skulle utføre sine oppgåver. Ho fekk liturgiske oppgåver også. Dette var lærerike og interessante år.

Før ho byrja på teologistudiet på Universitetet i Oslo var ho forteljar også. I studietida var ho med i ein studentorganisasjon som heiter Tårnseilerne. Dei arrangerar operaball for studentane. I forkant er det kurs så deltakarane kan lære å lage kostymer og masker, og dei får lære litt dans. Kostyma og maskene skal stå i stil med operaen sitt emne. Kostyma brukar dei både på operaframсыninga og på ballet om kvelden. Då er det underhaldning med ulike typar song og musikk, særleg klassisk. Kunst handlar om å formidle. Det seier oss noko som vi ikkje finn ord for. Hege er interessert i finne uttrykksmåtar for det som er vanskeleg å uttrykkje med ord.

For 14–15 år sidan kom interessa for hest tilbake. Då skaffa ho seg sin eigen. Seinare har ho kjøpt ein til. Hestane



Foto: Roger Oldeide, Fjordingen

har ho teke med seg. No er dei på Stranda, men ho reknar med å flytte dei til Eid etter kvart.

Då ho bestemte seg for å studere teologi, hadde det modnast gjennom tida på folkehøgskule og bibelskule, kombinert med erfaringane frå ungdomsarbeid, formidling, den kunnskapen ho hadde med heimanfrå og ikkje minst gjennom tida som kyrkjetenar.

Hege likte seg svært godt på teologistudiet. Ho skreiv hovudoppgåve om liturgien, og ho er svært oppteken av korleis dei liturgiske tekstane kan formidlast. Hege legg stor vekt på samspelet mellom prest og kyrkjerom, og samspelet mellom prest og kyrkjelyd. Men det viktigaste er samspelet mellom prest/kyrkjelyd og Gud. Det ho har lært gjennom forteljarkunsten kjem godt med. Gudstenesta skal vere ei felles oppleving.

I seks år lærte ho og dei andre studentane å uttrykkje seg gjennom akademisk skiving, men ei preike skal høyrast, og det perspektivet har ho med seg når ho førebur preikene. Ho likar å formidle tekstane i forteljingar. Det er lettare å hugse ei historie som fortel noko om teksten enn ei teologisk forklaring av teksten.

Hege vil legge vekt på å presentere tekstane på ein god og forståeleg måte.

Hege føler seg velkomen i soknet og ser fram til arbeidet her. Tidlegare har ho vore med i både kammerkor og blandakor. No har ho byrja i Hornindal songlag.

Vi ønskjer henne lukke til i prestegjeringa!



Hege Høibye ordinert til teneste

Anne Lødemel Honningsvåg

Søndag 2. april var det ordinasjonsgudsteneste og kyrkekaffi for vår nye sokneprest i Randabygd, Nordsida og Hornindal, Hege Høibye. Medverkande i gudstenesta var biskop Halvor Nordhaug, prost Rolf Schanke Eikum, vår nye sokneprest Hege Høibye, Mari Saltkjel, tidlegare sokneprest her og no sokneprest i Vågsøy, Sylvi Baardseth Pansjwani, tidlegare sokneprest i Gamle Aker kyrkje, Jon Ytrehorn, tidlegare sokneprest her, Christine Helgesen Haugen, soknerådsleiar i Hornindal, Bjørn Erik Høvik Schjerverud frå Teologisk fakultet, Beate Nes kateket i Stryn og Hornindal, Anitha Kvamme organist, Hornindal songlag med dirigent Elena Stefanova Doynova Kadlas og Kristian Finn Risung

Under kyrkekaffien var det helsingar og overrekking av gaver, m.a. frå dei tre kyrkjelydane.

Alle dei tre sokneråda tok del i praktiske oppgåver og tenester og gjorde dagen til ei rik fellesoppleving for alle fram-møtte.



Nokre av dei frammøtte.

Prosesjonen. Foto: Anitha Kvamme.



Sylvi Baardseth Pansjwani, tidlegare sokneprest i Gamle Aker kyrkje.



Stolt mor, Anne Marie Høibye.



Naboprest Ingrid Finsådal.

Ordinasjon er innviing til kyrkjeleg teneste, særleg prestetenesta. Bøn og handspålegging er viktige virkemiddel, jfr. Apg 6,3–6; 14,23; 1 Tim 4,14; og 2 Tim 1,6. I den romersk-katolske kyrkja er ordinasjon eit sakrament som set den ordinerte i stand til å forrette dei handlingane som er tillagde vedkommande teneste. Dei evangeliske kyrkjene ser på ordinasjonen som ei overdraging av fullmakta til å forkynne Guds ord på kyrkjelydens vegner, og særleg forrette dåp og nattverd. Dette er alle kristne i og for seg i stand til, men har ikkje dermed rett til å gjere det «offentlig i menigheten».

SnL, Oskar Mendelssohn

Babysong i Stryn

Janet Rudolph, kyrkjelydspedagog



Dei fyrste leveåra i eit barns liv er svært viktige. Song, musikk, rytme og rørsle etter musikk har til alle tider vore foreldre sitt store kontaktpunkt med borna sine. Kven har ikkje opplevd at besteforeldre, foreldre og sysken har sunge kveldssongar, voggviser og barnesongar for ein då ein var liten?

Babysong i Stryn har vi hatt sidan vinteren 2009/2010 og vi gleder oss kvar tysdag over å kunne vere ilag og gi babyane våre full fokus i ei koseleg stund. Tysdag, kl 10.30 samlast vi i Betania, Stryn sentrum. For heile kommunen vil Stryn baby-

song vere ein plass for å lære og å friske opp att denne songskatten saman med borna sine, et møtestad kor vi kan høre og gjøre, være og lære, synge og sanse, gynge og danse.

Husk at du som har baby/tvillingar treng ikkje å melde deg på, berre kom. Send gjerne bestemora om du vil og ho kan og vere gjerne igjen for ein prat rundt ein kaffikopp etterpå.

Følg gjerne facebookside vår StrynBabysong – vi begynner igjen etter sommaren når vi kjem til september.

Å vere saman om noko

Musikk er eit viktig stimuli for barn, og det kan vi ikkje begynne med for tidleg. Allereie i mors mage kan fosteret høyre lydar og musikk. Puls og rytme er ein del av fosterets omgivnader, og foreldre blir oppmoda til å synge for sitt ufødde barn. I barnas oppvekst er det òg viktig å presentere dei for musikk. Det har mykje å seie for utviklinga til barnet fordi musikken gjev barnet auditive, sansemotoriske og kroppslege opplevingar. På same tid er musikk ei ramme som barnet får høve til å uttrykkje og utfalde seg i. Den sosiale sida har ei sentral rolle i baby-songen. I musikken er vi saman om noko – vi deler ei felles oppleving og skapar noko i lag, og vi leikar og utforskar saman. Musikk i seg sjølv handlar i stor grad om samspel og kommunikasjon. Musikk og babysong gjev derfor barn og foreldre eller besteforeldre eit rom der dei kan vere saman og bli betre kjende med kvarandre. Samtidig får foreldra høve til å lære songar og regler som kan brukast i heimen. Nokre blir også meir fortrulege med å bruke stemma, og begynner å synge meir med barna. For barna er babysongtilbodet eitt av dei første møta med kyrkja. I musikkstunda syng vi òg barnesongar frå kristen barnekultur.

(Frå informasjonssidene til Den norske Kyrkja)



Kyrkjeklokka

Bladet vert sendt til alle husstandar i Stryn og Hornindal kommunar.

Web: www.kyrkjeklokka.no

Redaktør for dette nummeret er:
Olav R. Faleide
post@kyrkjeklokka.no

Forretningsfører/abonnement/adresseendring:
John Selmer Skiftesvik
6788 Olden. Tlf 990 28 076
john.skift.esvik@enivest.net
Bankgiro 0538 18 51054
Bankgiro 3795 30 05108
Kontingenten er frivillig.
Vi takkar for betaling og støtte.

Kontortider, telefon, e-post

Måndag er sokneprestane sin fridag.

INNVIK prestekontor

Mobil 911 84 241
Sokneprest Harald Runde
Tysdag, torsdag og fredag kl. 10–12
runde.harald@gmail.com

STRYN prestekontor

Tlf. 57 87 48 12
Mobil 948 32 875
Fungerande sokneprest Henny Koppen
Mobil 916 01 630
henny.koppen@stryn.kommune.no

HORNINDAL prestekontor

Tlf. 57 87 98 33
sokneprest@hornindal.kommune.no

KYRKJEVERJER

Stryn kommune

Børre Lian
Tlf. 57 87 48 11
Mobil 913 27 882
borre.lian@stryn.kommune.no

Hornindal kommune

Anne Lødemel Honningsvåg
Tlf. 57 87 98 34
Mobil 459 14 954
Måndag og torsdag kl. 09–13
anne.honningsvag@hornindal.kommune.no

Årsmøte i Kyrkjeklokka Bladlag

vart halde i Betania i Stryn tysdag den 7. mars 2017.

Styret for Bladlaget har vore Anna Marie S. Vatnamo (leiar) med personleg vara Ragnhild Vambeset, begge frå Innvik prestegjeld. Knut Sigurd Gald med personleg vara Anne Lødemel Honningsvåg, begge frå Hornindal prestegjeld, og Kolbein Kaspersen med personleg vara Olav R. Faleide, begge frå Stryn Prestegjeld.

Forretningsfører er som tidlegare John Selmer Skiftesvik. Styret/vara har hatt redaksjonsansvar for kvar sine nummer. Bladet kjem ut med fire nummer i året, og har blitt trykt på Solglimt trykkeri på Sandane.

Kvart nummer av Kyrkjeklokka blir lagt ut på nettet på www.kyrkjeklokka.no. Knut Sigurd Gald har ansvaret for websida. Frå og med denne utgåva vert bladet trykt hos E. Natvik Prentever AS i Florø.

Økonomien i laget er bra. Mesteparten av midlane er plasserte i fond. Utviklinga for Bladlaget sine fond, har ført til at midlar har blitt flytta til to nye fond. Resultatet viser kr. 41 421,33 i overskot.

Det blir drive mykje godt arbeid rundt om i sokna. Det er vanskeleg for redaksjonen å fange opp alt som skjer – og som skal skje – så redaksjonen er difor avhengig av å få stoff frå sokneråda og andre som veit om og deltek på arrangement. Sokneråda har tidlegare blitt oppmoda om å opprette ei eiga redaksjonsgruppe som sender stoff til kvart nummer. Vi gjentek denne utfordringa.

Styret vil takke alle som har sendt sine bidrag til Kyrkjeklokka. Særleg vil vi takke faste spaltistar. Bladet vert lese i dei fleste heimar, og er ein god informasjonskanal om det kyrkjelege arbeidet. Anna Marie S. Vatnamo har vore medredaktør i Kyrkjeklokka i ni år og har lagt ned ein stor innsats i å føre tidlegare redaktør Gunnar Nyggjerd sin stil vidare (sjå førre utgåve av bladet).

Redaksjonen vil gjere sitt beste for å halde ved like og vidareføre det som er opparbeidd gjennom åra, og inntil vidare vart Olav R. og Knut Sigurd oppmoda til å være redaktørar for to nummer kvar i året.

Etter valet ser det nye styret i Bladlaget slik ut:

Kolbein Kaspersen frå Oppstryn Sokneråd (leiar),

Knut Sigurd Gald frå Nordsida Sokneråd,

Kari Anne Tisthamar Haveland frå Utvik sokneråd

med Møyfrid Sømme Kvamme frå Olden sokneråd som vara.

Anna Marie S. Vatnamo og Ragnhild Vambeset frå Innvik Sokneråd gjekk ut av styret.

John Selmer Skiftesvik er forretningsfører.

– Redaksjonen



2016-utgåvene av Kyrkjeklokka.

Grøn side – del 2 av 5 Klimafakta og miljøtips

Om gjesteskribenten Gunnar Kvåle

Gunnar Kvåle er lege og professor (pensjonert) ved Senter for Internasjonale Helse ved Universitetet i Bergen. Han har arbeidd med forskning og utdanning og omkring helseproblem i fattige land. I seinare år har han vore spesielt oppteken av korleis ein kan redusere vidare klimaendringar og slik kunne avgrense skadar som i aukande grad vil råke born i fattige, men også i rike land.

Kvåle er styremedlem i norsk avdeling av «Besteforeldrenes klimaaksjon» og medlem av «Miljø og skapargruppa» i Bjørgvin bispedøme. Han bur i Os ved Bergen der han har ein fast spalte i Os kyrkjeblad: «Klimafakta og miljøtips».

Han har fleire gonger besøkt systera Ragnhild Lødøen med familie som bur i Hornindal. Kyrkjelokka takkar Gunnar Kvåle for løyvet til å publisere utdrag av nokre av artiklane hans.

Her følgjer den første:



Kyrkja og klimakrisa

Gunnar Kvåle

Leiinga i Den norske Kyrkja har i mange år vore opptekne av klima og vern om skaparverket. På Kyrkjemøtet i 2007 vart det halde fram at alle må forsake noko av forbruket sitt til beste for fellesskapet. På kyrkja si heimeside står det: «Når me skal velja ein berekraftig utviklingsveg framover, må me handla slik at andre kan handla på same måte som me.»

Dette er eit utfordrande krav. Klimautsleppa i Noreg er på vel 10 tonn CO₂-ekvivalentar per person per år. For å kome ned på eit berekraftig nivå må utsleppa våre ned til ein tidel av dette, altså berre vel eitt tonn!

Dei 10 % rikaste i verda er ansvarlege for heile 50 prosent av utsleppa på jorda. Hadde denne gruppa redusert utsleppa sine til det som er gjennomsnittet i EU, ville globale utslepp vorte reduserte med ein tredjedel. Det er ei klar grense for kor mykje klimagassar som totalt kan sleppast ut. Alt ekstra som me rike slepp ut, ofte utan at det er naudsynt, går difor ut over fattige som då må kutta tilsvarande mykje, sjølv om dei treng meir til eit minimalt livsopphald enn det dei no brukar.

På kyrkjemøtet i januar 2017 var klima oppe som tema i samband med at prosjektet «Skaparverk og berekraft» vart formelt avslutta. Kyrkjemøtet understreka at kyrkja sitt klimaarbeid skal

halda fram. Arbeidet med grønne kyrkjelydar vil stå sentralt og det skal satsast på å redusere utslepp frå kyrkja si eiga verksemd, reiser og anna. Alle må bidra om utsleppa skal kunna gå ned så raskt som klimakunnskapen krev!

Keltisk bøn

Du Guds sønn, forny mitt hjerte.
Din Ånd gir tone til fuglenes sang,
og bienes summing
Det du har skapt, er fullt av underverk,
så vakre å se på
Jeg ber bare om et under til:
At du gjør min sjel vakker!

Jon.

Frå boka «Din rytme Din bønn»
Keltiske bøner frå Lindisfarne



Gifte seg, – skal, skal ikkje

Tilsette i kyrkja registrerer at mange par har tenkt å gifte seg når eller viss dei får råd ein gong i framtida. Mange har nok ei forventning om at vigsla skal vere stor og fantastisk, og ei ser at dette, saman med festen etterpå blir både dyr og tid-

krevjande. Prestane i indre Nordfjord vil no tilby vigsla til dei som ynskjer det, utan kostnad. Dette vil skje i Nedstryn kyrkje, på ein og same laurdag, den 2. september 2017, og kvart par vil få tildelt 20 minutt til seremonien. I tillegg blir det servert kake i sakristiet.

Kvifor skal ein gifte seg? Det er ikkje noko spesielt kristeleg ved det å gifte seg. Vigsla, slik vi praktiserer det, er sjølv sagt ikkje omtala i Bibelen. Men der står mykje om å vere trufast, å ta vare på kvarandre og vise kvarandre respekt og omtanke, og dette har sjølv sagt mange praktiske sider som det blir orden på ved eit giftarmål.

Eg kan nemne noko av det som fell på plass når ein inngår ekteskap. Der er til dømes skattefordelar, både på inntektskatt og formueskatt. Ein kan også fordele gjeldsrenter og slik få utnytta heile rentefrådraget på lån.

Om ein skulle kome ut for samlivsbrot eller død er det og ein fordel å vere gift. Det er difor ikkje uvanleg med naudvigsel til dømes på eit sjukehus, dersom ein i forholdet skal dø.

Som gift er ein underlagt av eit grundig lovverk som regulerer korleis verdier skal fordelast ved død eller samlivsbrot. Dette gir begge partar klarare reglar og skiljeliner, uten at ein må setje opp ein heil del avtalar som sambuarar må gjere.

Desse opplysningane har eg frå nettsida Pengenyt. <http://www.pengenyt.no/dette-er-de-okonomiske-fordele-ne-med-a-vaere-gift/>

Det høyrer kanskje litt pussig ut at vi frå kyrkja si side brukar økonomi og arv som argument for ekteskap. Lesarane får sjå på det som eit positiv orientering til par som er i stuss om dei skal gifte seg eller ikkje. Hovudgrunnen til at menneske gifter seg er framleis at dei er glade i kvarandre og ynskjer tryggleik i forholdet. Og dette tilbodet frå kyrkja går til dei som ynskjer desse faste rammene om samlivet sitt, ordna på ein enkel måte.

Underteikna har sjølv vore i bryllaup til eit par som gifta seg 11 år tidlegare. Sjølv vigsla skjedde det enklaste vis, no, fleire år seinare, hadde dei endeleg råd til å feire. Kanskje ein ide for fleire.

Viss de vil gifte dykk den 2. september, utan «styr» og utan utgifter, så ta kontakt med eitt av prestekontora. De finn alle telefonnummer og epostadresser på side 5 i dette bladet.

Vigselspapir må ordnast på førehand. Dei arbeider raskt, men eit par veker må de nok ha på dykk. Og de må ha forlovarar som kan skrive under.

De finn alt på denne sida: <http://www.skatteetaten.no/Person/Folkeregister/Ekteskap-og-samliv>

Vigsel i kyrkja – ein fest for kjærleiken

Tekst og illustrasjonsfoto Den norske Kyrkja

Bryllaup er ein fest for kjærleiken. To menneske lovar å elske og ære kvarandre, og å halde saman i gode og vonde dagar resten av livet. Det handlar om dei to, men dei to står ikkje åleine. Løfta vert gjevne med vitne til stades.

Å inngå ekteskap eller vigsel er ei offentleg handling som kan skje borgarleg eller kyrkjeleg. Ein godkjend vigselsperson skal erklære at ekteskapet er gyldig. Eit bryllaup i kyrkja kan vere både enkelt eller meir påkosta.

Dagen kan feirast med familie, slekt og venner til stades, eller dei kan seie ja til kvarandre med berre prest og forlovarar til stades. Stort eller lite bryllaup – i kyrkja vert livet lagt fram for Gud med bøn om velsigning.

Alle par som har gifta seg borgarleg er velkomne til kyrkja for å be om forbøn for samlivet.



Av alle ekteskap som vart inngått i 2016, vart 33,4 prosent vigde i kyrkja.

Min salme

Elin
Endal
Aabrekk



Ein salme frå Norsk Salmebok som eg likar godt er «Du omgir meg på alle sider».

For meg er dette ein song om den tillit og tru eg har til Gud. Han er med meg kvar einaste dag, både i glede og sorg, i lette og tunge dagar, når eg kjenner på motløyse eller er jublande glad.

Uansett korleis eg har det, er Gud der. I Jes. 41.10 står det: «Ver ikkje redd, for eg er med deg. Sjå deg ikkje rådvill ikring, for eg er din Gud! Eg styrkjer deg og hjelper deg og held deg oppe med mi frelsarhand» Eg har opplevd fleire gonger at Gud gjev styrke og kraft i kvardagen. Eg stolar på at Han omgir meg på alle sider, og han held meg fast i si hand. Han vil vise oss den veg vi skal gå, hans auge kviler på oss han gjev oss råd. Gud sviktar ikkje, men held det han har lova. Det kan eg få stole på.

Eg vil utfordre Kjellaug Molnes til å dele sin salme.

«Du omgir meg på alle sider»

Norsk Salmebok nr. 498

Tekst: Arne Höglund,

Oversatt av Jan Ove Ulstein

1. Når min veg går gjennom tette skodda


nær ved bratte stup og djupe vatn,
då er du nær meg på alle sider,
ja, du leier gjennom vatn.

Omkved:

*Du omgir meg på alle sider,
og du held meg fast i di hand,
Du omgir meg på alle sider,
og du held meg fast i di hand.*

2. Når mi tru er svak og motet sviktar og eg kjenner kalde redslevindar, då veit eg trass alt at du er nær meg. Du har lova vere med kvar ein dag.

Omkved:



500 årsjubileum i eit heilt år

Av Oddny Torheim



Gudstenesta i Nidarosdomen 29. januar var offisiell opning av reformasjonsjubileet 2017. Eit jubileum som skal vare eit heilt år. No er vi halvveges. Mange arrangement er over, og mange er under førebuing. Mange artiklar er skrivne, og ein ny biografi: «Munken som endra Europa. Reformatoren Martin Luther», er utgjeven.

Ei vandrestilling om reformasjonen skal inn om 68 byar i 19 land. Bergen er ein av dei. Det var i Bergen den lutherske læra først slo rot i Norge. Der vart Luther festdagane arrangert i forbindelse med at utstillinga kom til byen 3.–7. mars.

Dagane hadde rikeleg innhald. Der var by vandring, kyrkjetårnvandring, kulturarrangement og debattar. Der var blant anna preikemeisterskap med 11 deltakarar. Ein ungdomsprest frå Askøy vann. Ho førebudde seg til ei tale til konfirmantane. Det som treff ungdomar ser ofte ut til å treffe også dei eldre.

Den andre hovudmarkeringa skal haldast i Trondheim med nasjonal gudsteneste på sjølve reformasjonsdagen 31. oktober. Den vert overført direkte fjernsynet.

Martin Luther vågde å stå opp mot dei aller største autoritetane – både pave og keisar. Han var villig å stå for det han meinte sjølv, om han visste at han risikerte livet for det. Han var også pådrivar for lese- og skriveopplæringa i Europa. Han sa at dersom han ikkje var teolog, så ville han ha vore lærar.

Luther sine «3 søyler» som seinare har bore den lutherske kyrkja – den protestantiske kristendomen oppe, var:

1. Skrifta åleine
2. Trua åleine
3. Nåden åleine

Desse punkta bør stå i denne rekkjefølgja. Utan Bibelens ord kan det ikkje vekse fram tru på Jesus Kristus. Og utan tru på Jesus kan ikkje mennesket mot ta nåde.

Luther understreka: Vi er alle tiggjarar i møte med Gud. Vi er fullstendig avhengige av Guds nåde. Luther seier om Fadervår: «Det er ikkje muleg på jorda å finne ei edlare bøn enn det daglege Fadervår. Det inneheld det vakre provet at Gud av hjartet gjerne høyrer oss, og det burde vi ikkje byte bort mot alle godar i verda».

Eit anna utsegn er: «Kva skogen er for dyret, huset for mennesket, reiret for fuglen, vatnet for fisken, det er Den Heilage skrift for den truande.»

Han seier også: «Eg har helde mange ting i hendene mine, og eg har mista dei alle. Men det eg har lagt i Guds hender, det har eg framleis.»

Han skrytte også av medmenneska sine. Han samanlikna ein gong vaskehjelpa Lena med ein from munk. «Langt meir from enn ein munk med kåpa si, er mi kjære Lena med skurekost og såpe».

Framhald neste nummer av kyrkjeklokka.



Frå v. Inge Asbjørn Haugen, Oddvar Bergset, Harald Runde og Hege Høibye.

Naustmesse 2. pinsedag

Alv O. Bergset

Også dette året vart 2. pinsedag høgtida med Naustmessa ved Bergsetnausta. Plassen er historisk, m.a. fordi naustmiljøet ved fjorden var ein stasjon for dei som i gamle dagar måtte «ro fjorden» for å kome til si eiga kyrkje i Utvik. Men pinsebodskapen var den same som den gongen, og vegen ned til nausta og opp att like eins. I underkant av 100 personar var samla i Skreddarhagen då ei noko spinkel klokke,

hengande i eit gammalt epletre, ringde saman til høgtida.

Og så steig salmen frå kyrkjelyden: «I all sin glans nu stråler solen —» til tonefølgje frå saksofon og piano. Prestane Harald Runde og Hege Høibye gjorde teneste, sistnemnde med preika for dagen. Og så var det piknik i fjæra før vi tok på heimveg, – nokre med båt, men dei fleste i god pinsetradisjon ved hjelp av apostlane sine hestar.



Kyrkjelyden fann seg plassar i den nyslegne hagen.



Konfirmasjonar 2017



KONFIRMANTANE I OPPSTRYN: F.v. Beate Nes (kateket), Ane Nytun Grønfur, Eskil Sørum Olsen, Reidun Nesheim, Sondre Erdal, Lise Fure Håvik, Henny Koppen (prest). Foto: Ole Eltvik.



KONFIRMANTANE I NEDSTRYN: Nede frå v. 1. rekke: Marte Lunde Sætre, Andreas Tømmerstøl, Malin Rise Gran, Tuva Fredheim, Caroline Lunde, Magnus Vik Skrede, Elise Høstland Vatne. Frå v. 2. rekke: Henny Koppen (prest), Ellen Marie Bøe, Ane Luji Egedal, Emilie Håberg, Synne Kristin Slåtten Sandbakk, Bjørn Tommy Silden Vinsrygg, Kristine Ekern Glosvik, Kjell Sunde Haugen, Oskar Guddal Breivik, Janet Rudolph (kyrkjelydspedagog). Frå v. 3. rekke: Elias Løddøen Flo, Tomas Tøsse Humborstad, Kjetil Lunde Vinsrygg, Sofie Gjøvåg Heggstad, Christine Indrebø Turøy, Michelle Solvik. Frå v. 4. rekke: Joakim Mundal Olsen, Birk Åsen Vinsrygg, Steffen Skoglund Bø, Nora Romsøe, Maren Othilie Flore. Frå v. 5. rekke: Stian Hjelmeset Oppedal, Nicolay Sundland Fure, Astrid Øvreberg. Konfirmantar Nedstryn som ikkje er med på bilde: Anna Langø Hogrenning, Martin Walaker, Sigurd Fotland Fænn. Foto: Ole Eltvik.



KONFIRMANTANE I HORNINDAL. Bakre rekke fra venstre: Kateket Beate Nes, Roar Gausemel, Nikolai Sætren, Markus Olai Øen, Nataniel Nygård Heggen, Sivert Olai Raftevoll Sølvsberg, Arild Holmøy Østerbø, William Stokkeland, Severin Otterdal Heggen, Rita Lødøen Hamre Lødemel og prest Hege Høibye. **Nest bakre rekke fra venstre:** Oliver Gullbrå og Einar Matvik Lillestøl. **Nest fremste rekke fra venstre:** Hannah Sofie Flaten, May Britt Navelsaker, prest Olaf Sigurd Gundersen, Siri Oline Lillestøl og Julie Madeleine Lødemel. **Fremste rekke fra venstre:** Sara Muldsvor, Randi Olin Bjørneset Seljeset, Ailén Mari Olsen og Kristine Mjåtveit Lødemel. **Foto:** Marta Lystad Johansen.



KONFIRMANTANE I RANDABYGD 20. MAI:
Frå venstre: Gunn Kristi Tvinnereim, Alf-Tomas Takke Tytingvåg og Malene Hopland.
Prest: Hege Høibye
Kyrkjelydspedagog: Janet Rudolph.
Foto: Irene Stensaker.



KONFIRMANTANE I LOEN 27. MAI: Bak frå venstre: Daniel Auflem, Anders Sverre Sande Hoem, Johannes Garlid Tenden, Sjur Tenden Nesje, Andreas Auflem. Framme frå venstre: Netti Fløtre, Henriette Fløtre, Jenny Grov Kämpf, Kristin Bødal. Lengst til venstre kateket Beate Nes. Lengst til høgre prest Henny Koppen. Foto: Ole Eltvik.



KONFIRMANTANE I OLDEN:

Bakre rekke f.v.:

Daniel Gjerde
Myrold, Marius
Sunde Haugen,
sokneprest Harald
Runde, Oliver
Kjørsløvik.

Fremste rekke f.v.:

Lars Martin
Melheim,
Boglarka Mate,
Malin Hafssås
Sundsøy, Ronja
Kristin Gjerde
Mangard,
Sondre Hafssås.

Foto:

Bjarte Haugen.



KONFIRMANTANE I INNVIK 27. MAI: **Bak frå v.:** Anne Grete Eikenes Hilde. Ida Årdal Solbu. Bjørnar Lyslo. Sondre Skåden Aarreberg. Håkon Hammer Bergh. **Framme frå v.** Sokneprest Harald Runde. Thea Skåden Drageset. Marte Gardshaug. Madeleine Reme. Elias Hammer Bergh. Kristoffer Gjerde Årdal. Bjørnar Hatling Skåden.



KONFIRMANTANE I UTVIK. **Framme frå venstre:** Inger-Anne Kårstad og Haldis Katrin Sunde Risøy. **Bak:** Prest Harald Runde og Dainty Mekke. **Foto:** Barbro Marie Kårstad Sunde.



KONFIRMANTANE PÅ NORDSIDA 25. MAI: **Frå venstre:** Anna Birgitte Ulvedal, Leif-Inge Jevnlid, June Alette Slettenes. **Bak:** Kyrkjelydspedagog Janet Rudolph, prest Hege Høiby. **Foto:** Anders Flore.

Vegkyrkje er ei kyrkje som

- ligg i nærleiken av ein trafikkert veg
- har opne minst tre veker om sommaren, fem dagar i veka og minst fem timar pr. dag
- har vertskap og enkel servering
- tilbyr informasjonsmateriell
- har tilgang på toalett



Den første vegkyrkja opna i Tyskland i 1958, og no samarbeider eit internasjonalt nettverk i Danmark, Tyskland, Estland, Finland, Norge, Russland og Sverige. Kyrkjene er opne om sommaren, spesielt med tanke på turistar som ønskjer ein pause og ei stille stund. I Norge er det 50 vegkyrkjer, og i tillegg er fleire hundre kyrkjer opne utanom vanleg opningstid.

Loen Kyrkje blir Vegkyrkje

Olav R. Faleide



Reiseliv generelt, og turisme spesielt, har vore ei viktig næring for bygda Loen dei siste 150 år. Med sine knapt 700 innbyggjarar har Loen fleire arbeidsplassar enn fastbuande og minst like

mange gjestesenger. Hotella Alexandra og Loenfjord, 4 store campingplassar og eit hundretals utleiehytter fortel om ei reiselivssatsing og ein aktivitet som saknar sidestykke på landsbygda i Norge. Aktivitetar og attraksjonar som Loen Active, Via Ferrata og Loen Skylift er eineståande tilbod for dei fleste interessegrupper. Dei besøkande til kyrkja er for ein stor del overnattingsgjester og langtidsferierande hos dei nyss nemnde, men kjem også frå nabobygdene som også har stor aktivitet i segmentet fritidsreiser.

Med velvilleg hjelp av tidlegare kyrkjetenar Bendikt A. Sæten, som også er næraste nabo til kyrkja, har det vore mogeleg å utøve vertskapsrolla frå kl. 10.00 til kl. 22.00 i perioden 20.06. til 20.08. sidan 1980. Han fyller 85 år i år og seier at det tek til å minke på kreftene. Etter å ha halde opa kyrkje kvar sommar i meir enn 35 år, har Loen kyrkje no fått status som vegkyrkje.

Informasjonshefte om kyrkja og bygda har vore tilgjengelege for publikum på fleire språk, sjølv sagt i ulike versjonar og opplag gjennom alle desse åra, og kyrkja stettar alle krava for å bli godkjend som Vegkyrkje:

Ho ligg 600 m. frå Rv. 60, sentralt i bygda med stor trafikk året rundt, lett synleg frå gjennomfartsvegen. Loen Kyrkje har vore opa for besøkande åtte veker om sommaren, sju dagar i veka og ti timar kvar dag dei siste 37 år. Loen Sokneråd har inngått ein avtale med lokale, kunnskapsrike og yngre medarbeidarar som snakkar fleire språk. Dei vil vere tilstades minst fem timar dagleg i heile skuleferien, slik at opningstidene blir uendra. Som enkel servering blir det tilbode kaffi/te, mineralvatn, kjeks og nysteikte vaflar med tilbehør, innanfor Mattilsynets regelverk. Informasjonsheftet føreligg på språka norsk, engelsk, tysk, fransk og spansk. Utstillingsmontasjar med både historisk og samtids informasjonsmateriale blir no plassert i våpenhuset. Vertskapet i kyrkja vil også kunne bidra med meir informasjon på spørsmål frå besøkande. Toaletta, eitt av dei med universell utforming, vil vere tilgjengelege i opningstida.

Nytt grusdekke rundt Hornindal Kyrkje

Anne Lødemel Honningsvåg

Hornindal kyrkje har fått nytt fint grusdekke kring kyrkja. Dette er ei gåve frå Hornindal Hagelag og Hornindal Bygdekvinnelag. Arbeidet med å leggje det ut vart leia av Sigmund Lødemel og Lars Andreas Tomasgård som stilte med maskinutstyr. Med seg hadde dei ein god dugnadsgjeng som også raka og rydda elles på kyrkjegarden. På bilete ser vi nokon av dei.

Soknerådet takkar for gáva og dugnadsinnsatsen, og for hortensiane frå hagelaget som står ved kyrkja.



Frå venstre: Arnfinn Kirkhorn, Marit Seljeset, Sigmund Lødemel, Lars Andreas Tomasgård og Jofrid Lødemel.

Framme: Inger Marie Lefdal Kirkhorn.

Arrangement i Acta – barn og unge i Normisjon, sommar 2017

Katarina Aabrekk – Actamedarbeidar i Sogn og Fjordane



I Acta – barn og unge i Normisjon er det snart klart for sommarleirsesongen 2017 på Fjordly (Bryggja) og på Teigen (Eikefjord). Å reise på leir inneber å overnatte heimanfrå, å bli kjend med nye menneske – både på sin eigen alder og med flotte leiarar, å finne på mykje kjekt saman, samt å få høyre meir om Jesus og misjon. Alt dette gjer at vi lærer noko nytt og får oppleve noko unikt – eit skikkelig leireventyr! Vi tilbyr mange spennande aktivitetar og samlingar. Mellom anna kan vi nemne båt- og badeliv, fotball, volleyball, kubb, god mat, bibelstunder, kveldssamlingar framføre peisen eller bålet, underhaldning og mykje meir! På leir er det mange menneske i sving for at deltakarane skal få ei super oppleving. Som leiarar er det med ungdommar og vaksne som brenn for at deltakarane skal ha det bra, få lære meir om Jesus og få eit eventyr av beste sort. Finn ein leir som passar for deg og bli med, då vel!

- 16.–18. juni: Minileir, Fjordly (4 år – 3. kl. (med følgje), born: kr. 690,- / vaksne: kr. 850,-)
- 16. – 18. juni: Amigosleir, Teigen (1. – 4. kl. (1. kl. m/følgje), born: kr. 690,- / vaksne: kr. 850,-)
- 23. – 26. juni: Tweenseir 1, Fjordly (4. – 7. kl., kr. 850,-)
- 30. juni – 2. juli: Tweenseir, Teigen (4. – 7. kl., kr. 690,-)
- 30. juni – 3. juli: Tweenseir 2, Fjordly (4. – 7. kl. kr. 850,-)
- 7. – 11. juli: Tenleir, Fjordly (8. kl. – 18 år, kr. 1.020,-)
- 28. – 30. juli: Familieleir, Fjordly (barn 0 – 4 år: gratis / 4 – 11 år: 820 / 12–18 år: kr. 980,- / vaksne: kr. 1.430,-. Makspris pr. familie: kr. 4.500,-.

Meir informasjon og påmelding: www.normisjon.no/sof eller mail og tlf. acta.sof@normisjon.no, 57 86 63 49



ORDET ER LIV

– den nye andaktsboka til Vidar Bergset

Vi som har brukt den førre andaktsboka hans, «Skatten i åkeren», er glade for at vi no kan ta i bruk også ei ny. I den første var der andakter for eit halvår, og eit liknande tal er det vel i den nye, så no kan vi lese andakter av Vidar kvar dag gjennom heile året.

Vidar Bergset er ein allsidig forfattar. Han har gitt ut mange bøker, diktsamlingar, forteljingar og blant anna ein biografi om Kaj Munk. Trass i høg alder er Vidar framleis produktiv. I fjor kom ei bok om det norske språket, og i år altså den nye andaktsboka.

Denne boka, som den førre andaktsboka, er samansett av korte, konsentrerte meditasjonar over bibeltekstar. Vi oppdagar at aktualisering av bibeltekstane er eit viktig formål med boka.

Forfattaren hentar døme frå det daglege, samla frå røynsle gjennom eit langt liv. I all si forkynning er han realistisk og jordnær. Etter lang tid som lærar i fleire skuleslag og som forkynnar i mange år, har han ein særleg føresetnad til å legge fram Ordet og å få kontakt med lesaren.

Andaktene er først og fremst forkynning av evangeliet, men Vidar er ikkje redd for å ta opp etiske spørsmål og kvardagslege problem.

Boka er til oppbygging, fornying og hjelp i kristenlivet og kan trygt tilrådest for alle som ønskjer ei god andaktsbok på nynorsk. Omslaget er vakkert illustrert av Magne Kristiansen.



Ingolv Muri

40 år med friluftsgudsteneste på Bruasetra

Anne Lødemel Honningsvåg

Skjærtorsdag hadde om lag 60 personar hadde teke turen til Bruasetra i flott opphaldsvêr. I år var det 40. gongen, og det heile starta i 1977 med at nyttilsett sokneprest Ole Amund Gillebo ynskte at det skulle vere ei friluftsgudsteneste også i Hornindal i påska. Valet fall på Bruasetra, ved hytta til Sigbjørn Hjellbakk. Familien Hjellbakk fortener stor takk for

hjelp, velvilje og nærvær i alle desse åra. Jon Ytrehorn har hatt gudstenestene sidan 1980 og Inge Asbjørn Haugen med saksofon har vore med på dei fleste av desse. I år hadde Jon også fått med seg Tedros Bereket Weldetnsae, frå Eritrea som tekstlesar.



Foto til venstre: F.v.: Inge Asbjørn Haugen, Tedros Bereket Weldetnsae og Jon Ytrehorn.

Også i år blir det messe på Selja, og i år, fyrste søndagen i juli. Tor Berger Jørgensen, kjend som biskop i Sør-Hålogaland gjennom mange år, og tidlegare NMS-general, blir med oss på gudstenesta. Og så kjem Bergen domkor, med dirigenten sin, domkantor Kjetil Almenning frå Gloppen. Pilegrimar, kyrkjeleg tilsette og «folk flest» vil setje sitt preg på dagen og den store gudstenesta i klosterruinane.



Tor Berger Jørgensen vil halde talen denne dagen, og delta i gudstenesta saman med fleire andre prestar. Han er kjend som ein engasjert og tydeleg biskop, og har vore ei sterk røyst i samfunnsdebatten på fleire hald, mellom anna opna han på eit tidspunkt hagen i bispegarden for romfolk og tigarar som ikkje fann annan stad å slå opp telte sine.

Klima, oljeutvinning, flyktningspørsmål og skattepolitikk er andre spørsmål han har engasjert seg i, og homofilisaka har han heller ikkje styrt unna. På Selja blir det vel ikkje dei store, politiske spørsmåla som vil stå i sentrum, men vi gler oss til å høyre ein engasjert og samfunnsmedviten prest.



Bergen Domkor kjem rett frå Irland etter ei songarferd der. På koret si eiga heimeside kan vi lese at dei tel 32 medlemmer og at dei legg vekt på å presentere spennande repertoar, ei god blanding av kjent og ukjent, gammalt og nytt.



Dette koret er i toppklasse, og det skuldast ikkje minst dirigenten, Kjetil Almenning, som er ein av dei fremste dirigentane i landet. Han har vunne den internasjonale dirigentkonkurransen Eric Ericson Award, og han har dirigert vidkjende kor som Ginnungagap og Ensemble 96. Plata «Kind» frå sistnemnde kor vart nominert til Grammy i USA i 2011. Vi har såleis mykje god musikk å sjå fram til når Bergen Domkor og Kjetil Almenning inntek klosterruinane.

Før dei kjem så langt vil dei halde tre konsertar i området. Den fyrste i fabrikklokala til Nordvestvindauget, i Almenningen. Dette skjer fredag kveld den 30. juni kl. 19.00. Laurdag 1. juli går turen til Vanylven, og Hakallegarden. Denne garden er kjend frå barne-TV-serien «Marit og dyra», og denne dagen blir her altså konsert i løa kl. 14.00. Dei som tek turen til Halal-lestranda denne dagen kan altså få med seg svært mykje.

Den siste konserten blir i Selje kyrkje same kvelden, 1. juli kl. 19.00. Konsertane vil koste 300 kr pr vaksen. Alle born går gratis, og vi vonar mange vil ta med borna sine og presentere dei for god kormusikk.

Pilegrimsvandring høyrer Seljumannamesa til, og i år blir det fleire tilbod. Fredag blir det ei vandring leia av Brit Lundby Hilde, og laurdag ei ny, Ved Kari leine Balog. De kan ta kontakt med leiarane, Brit Lundby Hilde: brit.lundby.hilde@enivest.net tlf 911 09 933 eller Kari leine Balog: Kari.Leine.Balog@selje.kommune.no tlf 95 05 62 53. Ei pilegrimsvandring frå Hareid på Sunnmøre og fram til Selja blir arrangert av NMS. Kontakt der er: Janne Bjune: jbj@nms.no tlf. 40 40 60 62.

Søndag 2. juli går det båt frå Selje til Bø: Kl. 10.30, retur frå Bø kl. 14.30. Avgrensa høve til båttransport heilt ut til klostret. Billettpris: kr. 200, familiar kr. 400 (barn under 15 år gratis.) Info-telefon: Roald Halsør tlf. 99 26 94 10.

Velkomne til ei god oppleving i ein flott natur!





Slekt
skal følgje
slekters
gang



Or kyrkjebøkene Innvik prestegjeld, Hornindal prestegjeld, Stryn prestegjeld

UTVIK

DØYPTE:

- 08.01. Martine Rosøy Tisthamar
(døyp i Innvik).
For.: Anders Valaker Tisthamar og
Mariam Rosøy Wathne.
- 29.01. Oline Hauge – Nesdal
(døyp i Innvik).
For.: Jan Erik Nesse Nesdal og
Ellen Hilde Haugen.

INNVIK

DØDE:

- 0812.16 Signy Skåden, f. 1924.

OLDEN

DØYPTE:

- 06.11.16 Jakob Strand Beinnes.
For.: Jan Michael Beinnes og
Elisabeth Strand.
- 06.11.16 Ida Hagelskjær Vangberg.
For.: Geir Øyvind Vangberg og
Cecilie Hagelskjær Vangberg.

DØDE:

- 14.01.16 Kåre Narum f. 1946
- 31.12.16 Gunnar Nygjerd f. 1939
- 08.01.17 Rita Josefine Skarstein f. 1935
- 15.01.17 Geirtrud Yri f. 1927

LOEN

DØYPTE:

- 04.21.16 Eline Stokova Grov.
For. Jana Stokova og
Richard Grov.
- 04.12.16 Mari Flo Loen.
For. Terese Flo og Jan Rune Loen.
- 19.02.17 Kristiane Alexandra.
Drageset-Nøstvold.
For. Oddny-Kristin Anette
og Alexander Drageset-Nøstvold.
- 19.03.17 Marte Julia Loen.
For. Aileen Tangcay Loen og
Oddgeir Loen.
- 27.05.17 Silja Myklebust-Fimreite.
For. Siri Myklebust og
Tony Fimreite.

DØDE:

- 09.02.17 Ragnvald Loen Greidung f. 1936
- 23.03.17 Laila Agathe Opheim f. 1938
- 22.03.17 Inger Eline Grov f. 1939
- 02.04.17 Kjellaug Holter f. 1922

RANDABYGDA

DØYPTE:

- 19.03.17 Liva Nesbakk Rand.
For. Vibeke Rand og
Stig Ove Nesbakk

HORNINDAL

DØYPTE:

- 12.03. Vetle Støverstein.
For. Ellinor Fivelstad og
Daniel Støverstein.
Døyp i Sunnlyven kyrkje.
- 16.04. Eiril Gausemel.
For. Janne-Elin og
Vidar Endre Gausemel.
- 16.04. Oskar Arne Svor.
For. Berit Wiedner og
Rasmus André Svor.
- 30.04. Mathilde Lunde Haugen.
For. Kristina Sandbakk Lunde og
Ronny André Haugen.
- 30.04. Madelen Bortne Espe.
For. Hanne Therese Bortne og
Håvard Hjelle Espe.
- 30.04. Kaspian Kjelsnes Grodås.
For. Ailin Nygjerde Kjelsnes og
Kjetil Grodås.
- 30.04. Matias Bøe Muldsvor.
For. Anita Bøe og Arne Muldsvor.

DØDE:

- 09.02. Ola Magne Strand f. 1940
- 24.03. Liv Støverstein f. 1928
- 05.04. Kjærlaug Nybø f. 1926
- 09.04. Rasmus Jørgen Tomasgard f. 1936
- 15.04. Arne Espe f. 1934

NEDSTRYN

DØYPTE:

- 26.02. Emine Saure-Magnussen.
For. Trude Iren Saure og
Peder Magnussen.
- 26.02. Johannes Gloppestad Hatledal.
For. Nina Tisthamar og
Kåre Gloppestad.
- 12.03. Dennis Vik.
For. Marita Guddal og
Ole Morten Vik.
- 09.04. Anna Jevnehagen Otterdal.
For. Jorunn Marit Jevnehagen og
Paul Otterdal.

- 16.04. Samuel Blaallid Karadas.
For. Henriette Blaallid og
Jan Azar Skipenes Karadas
(døyp i Eid kyrkje).
- 14.05. Emil Sæten Lind-Jenssen.
For. Kristine Sæten og
Kjell-Richard Lind-Jenssen.
- 23.04. Charlie Alexander Treasure.
For. Tonje Bjerkan og
Antony Thomas Treasure.

DØDE:

- 11.02. Steinar Hoffart f. 1924
- 13.02. Åsta Gjørven f. 1932
- 04.03. Erling Fritjof Aabrekk f. 1925
- 14.03. Henning Frode Dispen f. 1973
- 20.03. Margit Juklestad f. 1927
- 20.03. Kristi Hoffart f. 1929
- 04.04. Pernille Lunde f. 1921
- 16.04. Liv Eikenæs f. 1924

OPPSTRYN

DØYPTE:

- 18.12.16 Signe Amalie Norlie Lindvik.
For. Alice Margrethe Norlie og
Jarle Willy Lindvik.
- 02.04.17 Othelia Sungot Greidung.
For. Benedicte Sungot Greidung
og John Eirik Greidun.
- 02.04.17 Torgeir Reiel Hjelle Goffeng.
For. Maren Hjelle Guddal og
Reidar Goffeng.
- 16.04.17 Elianna Erdal-Vike. For. Anne
Merete Erdal og Roy Vike.


DØDE:

- 01.03. Olga Elise Nesje f. 1928
- 08.03. Arne Flo f. 1929
- 04.04. Anny Jenny Berge Alsaker f. 1927
- 07.04. Marit Oddlaug Grønfur f. 1924

VIGDE:

- 29.04. Dorteia Greidung og
Lee Martin Jones





SØNDAG ER KYRKJEDAG

Gudstenester i Indre Nordfjord

*Vi gjer merksam på at det kan verte endringar.
Nattverd og offer er ikkje med, så følg med i avisa «Fjordingen».*

Om det ikkje er gudsteneste i di kyrkje, er du velkommen i nabokyrkja!

25. juni; 3. s i treeiningstida – Luk 14, 15-24

Loen, 11.00 Gudsteneste. Ved Harald Rund.
Nordsida, 11.00 Gudsteneste. Ved Hege Høibye.
Sundshaugen,
Olden, 14.00 Friluftsgudsteneste. Ved Harald Runde

02. juli; 4. s i treeiningstida – Markus 10, 17-27

Selja, Selje, 12.00 Seljumannamesse. Talar er Tor Berger
Jørgensen, biskop emeritus frå Sør Håloga-
land. Bergen Domkor er med oss, domkantor
Kjetil Almenning, opphavleg frå Gloppen,
dirigerer.

09. juli; 5. s i treeiningstida – Matt 7, 15-20

Oppstryn, 11.00 Gudsteneste. Ved Henny Koppen.
Hornindal, 11.00 Gudsteneste. Ved Harald Runde.
Nedstryn, 11.00 Kveldsgudsteneste. Ved Henny Koppen.

16. juli; Aposteldagen – Luk 5, 1-11

Loen, 11.00 Gudsteneste. Ved Henny Koppen.
Nordsida, 11.00 Gudsteneste. Ved Hege Høibye.
Innvik, 16.00 Gudsteneste. Ved Harald Runde.

23. juli; 7. s i treeiningstida – Luk 15, 1-10

Randabygd, 11.00 Gudsteneste. Ved Hege Høibye.
Nedstryn, 11.00 Gudsteneste.

29. juli; Olavsdagen / Olsok – Joh 12, 24-26

Olden gamle
kyrkje, 19.00 Gudsteneste.
Oppstryn, 20.00 Gudsteneste. Ved Hege Høibye.

30. juli; 8. s i treeiningstida – Matt 6, 19-24

Myklebuststøylen,
Utvik, 15.00 Støylsmesse. Ved Hege Høibye.

6. august; 9. s i treeiningstida – Matt 11, 28-30

Nedstryn, 11.00 Gudsteneste. Ved Henny Koppen.
Svormuseet,
Hornindal, 12.30 Kulturgudsteneste. Ved Hege Høibye.
Utvikfjellet, 15.00 Gudsteneste. Ved Tore Myklebust.

13. august; 10. s i treeiningstida – Luk 5, 27-32

Innvik, 11.00 Gudsteneste. Ved Henny Koppen.
Nordsida, 11.00 Gudsteneste. Ved Hege Høibye.
Flofjellet, 12.00 Friluftsgudsteneste.

20. august; 11. s i treeiningstida – Matt 23, 37-39

Loen, 11.00 Gudsteneste.
Olden, 11.00 1. klasssegudsteneste. Ved Harald Rund.
Nedstryn, 19.00 Kveldsgudsteneste.

27. august; 12. s i treeiningstida – Luk 15, 11-32

Oppstryn, 11.00 Gudsteneste med tema Nåde.n
Utvik, 11.00 Gudsteneste. Ved Harald Runde.
Konfirmantjubiläum.
Hornindal, 11.00 Gudsteneste. Ved Hege Høibye.
Randabygd, 19.00 Kveldsgudsteneste. Ved Hege Høibye.

03. september; 13. s i treeiningstida – Matt 25, 37-39

Nedstryn, 11.00 Gudsteneste. Ved Henny Koppen.
Nordsida, 11.00 Gudsteneste. Ved Hege Høibye.
Presentasjon av dei nye konfirmantane.

Prestestøylen,
Innvik, 15.00 Friluftsgudsteneste. Ved Harald Runde.

10. september; Vingardssøndag – Matt 20, 14-30

Loen, 11.00 Gudsteneste. Ved Henny Koppen.
Olden, 11.00 Gudsteneste. Ved Harald Runde.
Presentasjon av dei nye konfirmantane og
konfirmantjubiläum
Hornindal, 11.00 Gudsteneste. Ved Hege Høibye.
Presentasjon av dei nye konfirmantane

17. september; 15. s i treeiningstida – Matt 7, 24-28

Nedstryn, 11.00 Gudsteneste med tema Skaparverket.
Ved Henny Koppen

24. september; 16. s i treeiningstida – Mark 7, 31-37

Oppstryn, 11.00 Gudsteneste. Ved Henny Koppen
Utvik, 11.00 Gudsteneste. Ved Harald Runde.
Presentasjon av dei nye konfirmantane
Randabygd, 11.00 Gudsteneste. Ved Hege Høibye.
Presentasjon av dei nye konfirmantane

01. oktober; 17. s i treeiningstida – Joh 11, 17-29 eller 30-46

Nedstryn, 11.00 Gudsteneste. Ved Henny Koppen.
Innvik, 11.00 Gudsteneste. Ved Harald Runde.
Presentasjon av de nye konfirmantane.
Hornindal, 11.00 Hausttakkefest. Ved Hege Høibye.

08. oktober; 18. s i treeiningstida – Matt 8, 14-17

Loen, 11.00 Gudsteneste. Ved Henny Koppen.
Ljosheim,
Oldedalen, 11.00 Hausttakkefest. Ved Harald Runde.
Nordsida, 11.00 Hausttakkefest. Ved Hege Høibye.

15. oktober; 19. s i treeiningstida – Luk 20, 45-21, 4

Nedstryn, 11.00 Gudsteneste med tema Frelsa.
Ved Henny Koppen.
Utvik, 11.00 Gudsteneste. Ved Harald Runde.
Randabygd, 11.00 Hausttakkefest. Ved Hege Høibye.
Olden, 16.00 Gudsteneste. Ved Harald Runde.

22. oktober; 20. s i treeiningstida – Joh 11, 1-5

Oppstryn, 11.00 Gudsteneste. Ved Henny Koppen.
Innvik, 11.00 Hausttakkefest. Ved Harald Runde.
Hornindal, 11.00 Gudsteneste. Ved Hege Høibye.

29. oktober; Botsog bønnedag – Luk 13, 22-30

Nedstryn, 11.00 Gudsteneste. Ved Henny Koppen.





B

 Full distribusjon

Birger Skåre ny kyrkjetenar i Oppstryn



Den 11. juni var Birger Skåre på plass som ny kyrkjetenar, ved gudstenesta i Oppstryn kyrkje. I over eit halvt år har kyrkjelyden vore utan fast kyrkjetenar, så det er ei stor glede at vi no har fått Birger på plass. Svein Rønne har gjort ein god jobb som vikar i denne tida, og det er vi takk-same for, men det er ekstra hyggeleg å ynskje ein mann som bur i bygda velkomen til teneste i kyrkjelyden.

Søndag 11. juni var også var «gamle» kyrkjetenar, Kjell Fagerstrand, på plass, no som rettleiar for den nye. Det er godt å ha kjentfolk til stades som kan vise til rettes og svare på alle spørsmål.

Birger Skåre er tilsett i ei full stilling som kyrkjegardsarbeidar i kombinasjon med kyrkjetenarjobben. Han går inn i eit team med fleire som er i same type stilling, og desse avløyser kvarandre etter behov. Vi ser fram til eit godt samarbeid, og ynskjer Birger lykke til i ein viktig jobb i kyrkja.

Oppstryn sokneråd

Gjenbruk av gravstøtter

Med jamne mellomrom blir graver sletta, og steinane fjerna frå gravstaden. Desse steinane blir lagra ei tid på ein eigna stad ved kyrkja, under påvente av at eventuelle pårørande vil ta dei med seg. Viss ikkje blir dei før eller seinare fjerna for godt. Slike gravsteinar kan svært gjerne brukast om att. Ein kan gravere nye namn på den andre sida, eller ein kan slipe ned namna som står der og bruke om att same sida. Begge deler blir gjort. Om nokon ynskjer å bruke ein slik brukt gravstein, kan dei ta kontakt med kyrkjegardsarbeidarane, eller kyrkjevevja.

GUDSTENESTE / FJELLSTEMNE

på Utvikfjellet (i kafeen ved skitrekket)
søndag 6. august kl.15.00

Kl. 15.00 Fjellgudsteneste.

I pausen vert det servering av kaffi, kaker m.m.

Vidare program er enno ikkje fastlagt, men vert annonsert i Fjordingen/Firda Tidend.

Dette er eit samarbeid mellom
Utvik og Breim Sokneråd.

I år er Breim arrangør.

KAFFIKROKEN



© Hans Johan Sogrusten

Neste nummer får du i Posten rundt 15. september. Redaktør vert Olav R. Faleide. Vi tek svært gjerne i mot stoff på e-post til: post@kyrkjeklokka.no innan 19. august.